

MINISTRO WILLEM VROLIJK TA HEREDA PROBLEMANAN DI SU COLEGA JUNIOR CROES

ORANJESTAD(AAN) Prome cu ministro Junior Croes a baha como ministro tabata tin un campaña promocional pisa pa elogia e ministro aki pa su supuesto tremendo trabaoan haci den Ministerio di Transporte, Telecomunicacion y Deporte.

No tabata pasa un dia cu medionan di comunicacion no tabata haya comunicadonan di elogio pa ministro Junior Croes combina cu fotonan y straño tabata cu e comunicadonan no tabata procedente di partido OLA cu

a pone Junior Croes temporalmente como ministro riba tal posicion y OLA mes como partido a worde laga un banda.

Junior Croes tabata ministro pa partido OLA pero ta dicon no tabata tin traspaso di ministerio di Junior pa Willem?

Den pasado politiconan tabata acusa otro di no tabata haya cooperacion di otro pa cu traspaso di ministerio ora cu gobiernonan tabata baha y otro mester a subi, pero den e caso aki ta un ministro di OLA a baha pa otro di OLA asumi puesto y esaki ta encera cu den un partido na mando mester tin cooperacion entre dos ministro cu ta cambia di posicion.

Nada di esaki tabata e caso pasobra ministro Junior Croes a baha mientras cu prome cu el a baha tabata tin mas preocupacion pa elogia su supuesto bon maneho na lugar di percura pa Willem Vrolijk haya un bon introduccion den e ministerio cu e mester a tuma over y esaki ta muestra cu algo no tabata holer bon den partido OLA.

Ora cu Willem Vrolijk a bira ministro e mester a cuminsa den pura pasa di un departamento pa otro pa pa inventariza y evalua kico tabata e asuntoan mas urgente pa atende y for di e prome dia den su funcion operativo el a haya su mes cu accionnan confronta siendo cu ta su colega anterior Junior Croes supuestamente a hiba asina bon maneho cu tur cos tabata bon regla, pero e siman aki a muestra cu mucho cos no tabata dje bon regla ey manera cu e comunicadonan bunita traha pa elogia Junior Croes tabata pretende.

Awor Willem Vrolijk mester bay atende problemanan manera Postkantoor, Tele Aruba, Setar, asuntoan di Telecomunicacion y Transporte y segun informacionnan cu DIARIO a haya, tin diferente trampa bon traha pa e ministro nobo kende mester bay tuma medidanan drastico pa sana su ministerio y cu tal accionnan ta poni pa laga Willem haya mal fama.

Rumornan ta core cu cos a bay asina leu cu te hasta Junior Croes no ta miembro di

partido OLA mas y cu Willem Vrolijk mester bay wak con e ta bay rek su som

cu e problemanan cu el a hereda di su colega ministro y colega miembro di partido.

Persona cu mester sa mihor a comete e acto! Cruelmente a kima un cacho

ORANJESTAD (AAN): Matutino DIARIO a ricibi informe indicando cu un persona (kende pa su profesion mester sa mihor) a cende un cacho bibo, y a lage muri tur na candela. E caso aki lo a tuma lugar na Savaneta den vecindario di "Double Seven".

Esnan cu a suministra e informe a duna di conoce cu parce e cacho pa un of otro motibo a worde seriamente maltrata. No ta conoci si e cacho aki tabata sufri di cualkier malesa y si ta pesey a deshaci di e animal aki, door di lage kima.

Esun (of esnan) cu a comete e acto cruel aki, sikiera por a transporta e cacho pa despacho di Veterinario pa nan tuma e medidanan apropiada pa pone e cacho drumi via di hangua.

Loke a hala atencion, y cu ta indica cu esun cu a comete e acto aki mester sa mihor, ta cu ta trata aki di un agente Policial. Sinembargo number di e agente no a worde mencionada, debi cu nan tin temor cu represaya ta worde tuma.

Sinembargo e ta un acusacion serio, y pa colmo un agente policial ta comete algo asina inhumano contra un pover animal. Pues ta na su lugar pa autoridad competente laga investiga e caso mesora, pa kita tur duda. Maltrato serio di animal ta castigable pa ley.

Algun estudiante di Examen Klas VWO no a haya ainda dos buki cu nan a bestel

ORANJESTAD(AAN) -- Di e bukinan cu studiantenan di Examen Klas (VWO) a bestel, tin dos, un cu mester a bin di Hulanda y otro di Merca, cu algun estudiante no a haya te ainda.

Segun comentario duna na DIARIO pa un par di mayor, nan ta preocupa pasobra despues di algun siman di e siguiente periodo di C.P. cu ta cuminsa dialuna venidero, lo sigui cu S.O., y si e S.O. nan concerni lo ta basa den e bukinan cu ainda e studiantenan no a haya, nan lo por confronta cu problema durante examen.

E mayornan ta comenta cu nan no a tende nada mas di e lugarnan unda nan a bestel e bukinan, y nan ta asumi cu nan lo no bin pa awor tampoco.

Mientras tanto e studiantenan cu falta e bukinan ta hayando fotocopia for di e docentenan, pero por core e riesgo cu esaki lo no ta completa e material cu e studiantenan mester a siña for di e bukinan ey.

Ohala cu e studiantenan concerni lo no worde afecta debi cu nan no a haya e dos bukinan te ainda, y tambe ta di spera cu e supliernan concerni lo no bin yama cas pa bisa cu e bukinan a yega ora cu school ta cla pa caba, y obliga e mayornan pa paga e bukinan cu nan yiunan lo no bay probecha mas.

BELASTING Y2K NA CAMINDA!!

